

Isumaginninnermut tunngasunik nakkutillineq pillugu Namminersornerullutik Oqartussat nalunaarutaat nr. 6, 16. februar 2006-meersoq Atuussimasoq (Historisk)

Isumaginnittoqarfiup aqunneqarnera aaqqissuussaaneralu pillugit Inatsisartut peqqussutaatnr. 11, 12. november 2001-imeersumi § 1, imm. 2 naapertorlugu makku aalajangersarneqarput:

Kommuunik nakkutillineq

§ 1. Isumaginninnermut inatsisini maleruagassat kommuunit eqquutsinneraat aammalu inatsisini ingerlatsinnermut tunngassuteqartuni maleruagassat naapertorlugit ingerlanneraat Ilaqutariinnermut naalackersuisoqarfiup nakkutigisaraa.

Imm. 2. Nakkutilliinnermut pineqarput allaffissornikkut aqutsineq paaqqinniffiillu.

§ 2. Nakkutilliilluni takusaanerit pisassapput kommunalbestyrelsimut qinigaaffiup iluani minnerpaamik ataasiarluni.

Imm. 2. Ilaqutariinnermut naalackersuisoqarfiup pisariaqarsorippagu imm. 1-imi taaneqartumiit annertunerusumik nakkutilliisoqassaaq.

§ 3. Nakkutilliisutut takusaanissaq sivikinnerpaamik sapaatit akunnerinik marlunnik sioqqutsisumik kommunalbestyrelsimut nalunaarutigineqassaaq.

§ 4. Nakkutilliisutut takusaanermi ilaatigut suliassaqarfanni aalajangersimasuni suliata ataasiakkaat misissuiffigineqassapput. Misissorneqassaaq isumaginninnermut inatsisit naapertorlugit aalajangiisoqartarsimanersoq.

§ 5. Nakkutilliisutut takusaanerit tamaasa Ilaqutariinnermut naalackersuisoqarfik nalunaarusiortassaaq. Nakkutilliinnermit nalunaarusiaq kommuunip aamma kommuuninut Nakkutilliisoqarfiup tigussavaat. Taamaaliortoqartassaaq sapinngisamik qaammatit marluk qaangiutsinnagit.

Imm. 2. Nakkutilliinnermit nalunaarusiap nassiunneqarneraniit qaammatit arfinillit qaangiunneranni Ilaqutariinnermut naalackersuisoqarfiup kaammattuineratigut nalunaarusiami assuarineqarsimasut, inatsisunik paatsuuisimaneq sullissinnermilu kukkussutaasimasut aaqqinniarlugit qanoq iliuseqartoqarsimaneranik allakkatigut nassuiaammik kommuuni nassitsissaaq.

Ulloq unnuarlu paaqqinniffinnik nakkutillineq

§ 6. Ulloq unnuarlu paaqqinniffinnik Namminersornerullutik Oqartussat pigalugilluunniit ingerlataannik aammalu kommuninut pigineqartunik imaluunniit ulloq unnuarlu paaqqinniffinnik imminnut pigisunik nakkutillineq Ilaqutariinnermut naalackersuisoqarfimmit isumagineqassaaq.

§ 7. Nalunaarut manna atuutilerpoq 1. marts 2006-imi.

Imm. 2. Tamanna ilutigalugu isumaginninnermut tunngasunik nakkutilliineq pillugu Namminersornerullutik Oqartussat nalunaarutaat nr. 43 18. december 2001-meersoq atorunnaarsinneqarpoq.

Namminersornerullutik Oqartussat, 16. februar 2006

Aleqa Hammond

/

Martha Lund Olsen